

DIDZA' BURÓP BSÖLĚ'Ě PABLO QUEĚBI' BI'I TIMOTEO

Pablo rugapĚ' Dios bi'i Timoteo

1 Neda', Pablo, naca' gbaz nasölĚ'Ě Cristo. Cni naca' le rĚ'nnĚ' gaca' cni Dios, quiĚ cni utság le gzxĪ' lu nĚ'Ě, gunnĚ' queĚru' yöl-la' na'bán gdu, le ruzá' ladxĚ'Ě queĚru' Jesucristo. ²Rugapa' Dios li', bócha'adau' Timoteo, nacu' ca zxi'ncza' le réjlĚ'ru' Cristo, ati' nadxi'ida' li'. Rnaba' lahuĚ' Xuzru' Dios lenca' lahuĚ' Xanru' Jesucristo, uzá' ladxĚ'Ě quiu' len huechi' ladxĚ'Ě li', len gunĚ' ga soa dxi' icj ládxi'da'u.

**Timoteo ral-la' gunbi' Ina'
lau queĚ' Jesucristo**

³Xclenu', rĚpa'-nĚ' Dios ca nac quiu' cati' rulidza'-nĚ' Dios. Cutu rzoa dxia' rnaba' ni'a quiu' rĚl len tĚ dza lahuĚ' Dios, Nu na' runa' xchinĚ' gdu ladxa'a ca na' glunĚ' xuz xtau'hua'. ⁴Cati' rajneyda' ca na' grödxu', rzĚ ladxa'a ulĚ'ida' li', quiĚ gac udzijda' gdu ladxa'a. ⁵RĚpa'-nĚ' Dios: Xclenu', le bdxin quia' le run ga rajneyda' ca réjlĚ'u Cristo gdu ladxu'u. LĚzca' cni, zi'al ca li' gulayĚjlĚ'nu LĚ' xna'u gul Loida len xna'u Eunice, ati' runa' löz, lĚzca' cni réjlĚ'u LĚ' na'a.

⁶Le nac cni, rusá'a ladxu'u uspanu' le bennĚ' quiu' Dios, lĚ na' bdxin quiu' cati' ni' bxoá na'a li' len bulidza'-nĚ' Dios. ⁷Bö' bennĚ' queĚru' Dios cutu nac bö' gun ga gádxiru', san bennĚ' queĚru' Bö' run ga naqui queĚru' yöl-la' huac len run ga nadxi'iru' lza'ru' len run ca' ga rna be'i cuinru'. ⁸Qui lĚ ni na', cutu utui'nu' gunu' Ina' lau queĚ' Xanru', len cutu utui'nu' ca rac quia' neda' ni, nadzuna' lidx guia le runa' xchinĚ', san ben tsaxón nup ta'zaca' ta'guí'i le tun lban qui didza' dxi'a. Dios gunnĚ' quiu' yöl-la' huac gunu' cni. ⁹Dioscz buslé' rĚ'u len bulidzĚ' rĚ'u quiĚ gacru' gdu dxi'a. Cutu bulidzĚ' rĚ'u le zoa le dxi'a benru' san bulidzĚ' rĚ'u le gu'ncznĚ' LĚ', len le ruzá' ladxĚ'Ě cni queĚru'. Dza ni'tĚ buzóĚ' cni queĚru' zĪ'atĚl ca guta' yödzyly ni, le náquĪru' queĚ' Jesucristo. ¹⁰Na'a, chbuluí' lahui le ruzá' ladxĚ'Ě queĚru' Dios, le buluí' lahuĚ' Jesucristo Nu ruslá rĚ'u. BugúĚ' yöl-la' gut len bulu'Ě lahui yöl-la' na'bán gdu na', le cutu ca' nit. Cni nac ca rna didza' dxi'a. ¹¹Cristo buzóĚ' neda' quiĚ guna' lban qui didza' dxi'a na', len quiĚ

gaca' gbaz queè' quiè usédgacda'
bunách gza'a. ¹²Qui læ ni na' rzaca'
rgui'a ca' yugu' le rac quia' ni, san
cutu rutui'da', le núnbè'a Nu na'
réjlè'a. Runa' löz Lè', napè' yöl-la'
huac gun chi'è le budöda' lu në'è ga
gdxintè dza ni' huödè'.

¹³Didza' dxi'a na' byönnu' bena'
lban qui ral-la' gac quiu' tu le ruluí'
ca ral-la' usédnu' bunách ca réjlè'ru'
Jesucristo len ca nadxi'iru' Lè'.

¹⁴Ben chi'i le nac dxi'a na' nadód lu
na'u, gunu' cni len yöl-la' huac queè'
Dios Bö' La'y, Nu zoalen rë'u.

¹⁵Chnözcnu' ca na' gulubíj
ládxi'què' neda' yúgu'tè bönni'
ta'yejlè'è Cristo nacu'è luyú Asia.
Nútsa'què' ladjqquè' Figelo len
Hermógenes. ¹⁶⁻¹⁷Rnaba' lahuè'
Xanru' Dios huechi' ladxè'è
bunách nacuá' lidxè' Onesíforo, le
butipè' ladxa'a zian lzu bönni' ni.
Cati' bdxiné' Roma, gdu ladxè'è
buguiljè' neda', ati' budzölnè' neda'.
Cutu butui'nè' ni'a quia' neda' le
nadzuna' lidx guia ni, nága'a du
guia. ¹⁸Rnaba' lahuè' Xanru' huechi'
ladxè'è læ' dza ni' gdxiné' lahuè'
Dios. Chnözcnu' ca na' gúclenè'
rë'u bönni' ni, cati' ni' gzoaru'
Éfeso.

**Ral-la' gacbi' Timoteo ca
bönni' gdu ladxè'è rijè' gdil-l**

2 Na'a, zxi'na'dau', btip ladxu'u
ca nac le ruzá' ladxè'è quiu'
Jesucristo. ²Didza' byönnu' bè'a
laugac zian nup tun lna' lau qui,
didza' ni bdöd lu na'què' bönni'
tunè' ca ta'né', bönni' gac lusèdnè'
ca' yela'gac bunách.

³Ral-la' gua' glenu' le lusaca' li' zi'
ca na' rua' rlen nu nac bönni' queè'

Jesucristo gdu ladxè'è rijè' gdil-l.

⁴Nu bönni' rijè' gdil-l, cutu ca'
gútsè'è yugu' le tun bunách yödzyú
ni, quiè ldzag ladxè'è læ' bönni' na'
nuzóè' læ' gaquè' bönni' queè' rijè'
gdil-l. ⁵Lézca' cni, nu nutsa' lu huitj,
cutu bi gdel-li' chqui' cutu run ca
ral-la' gun. ⁶Bönni' guz gu'n runè'
dxin, zi'al læ' uzi'è xbey læ' na' razè'.
⁷Busá' ladxu'u læ' ni rëpa' li', ati'
Xanru'cz gunè' ga tséjni'nu' yúgu'tè.

⁸Yajnèy ca guc queè' Jesucristo.
Guljè', guquè' zxi'n xsoè' David,
len gdöd gutiè', bubanè' lu yöl-la'
gut. Cni rna didza' dxi'a runa' lban
qui. ⁹Le runa' lban qui didza' dxi'a,
rzaca' rgui'a le rac quia', ga rdxintè
nága'a lidx guia ni, ca rac queè'
bönni' huia'dö', san cutu ca' nága'tè
xtidzè'è Dios. ¹⁰Qui læ ni na' rua'
rlena' yúgu'tè læ' ni le nadxi'ida'
nup gröè' Dios, quiè lulé' ca' lequè'.
Jesucristocz runè' ga lulá bunách
na' quiè la'cuá' lu yení' gdu queè'.

¹¹Catèz nac læ ni rna:

Chqui' nátlenru' Lè',
Sóalenru'-nè' ca' gbanru'.

¹²Chqui' gua' glenru' le saca'
qui'ru',
Gna bé'lenru' ca' Lè'.
Chqui' rdá'baga'ru' Lè',
Lè' tá'baguè'è ca' rë'u.

¹³Zal-la' cutu runru' ca rnaru',
Lè' rúnteczè' ca rnè'.

Lè' cutu gac tá'baguè'è le naquè'.

**Bönni' huen dxin queè'
Cristo rurujè' dxi'a**

¹⁴Bsa' ládxi'gac nup nacuá' ga
ni' zu' ca nac læ ni, ati' ni'a queè'
Xanru' Dios gna be'i lequè' cui
la'díl-l didzè'è ca nacgac didza'
cuzáca'gac. Yugu' didza' cni tun ga

la'nít nup ta'yöni leygac. ¹⁵Bè'tecz ladxu'u uruju' dxi'a lahuè' Dios quiè gacu' ca bönni' huen dxin cutu rutui'nè' ca nac dxin nunè'. Dxi'adau' ral-la' ugunu' dxin didza' gdutè li. ¹⁶Na'a, bcuit ga nacua' nup tui' didza' cuzaca' len didza' ca'z, le tun didza' cni ga lunrè' le curè'nnè' Dios. ¹⁷La'zé didza' tu'è ca rzxön huè' nudzu' le rdudu' rla. Nútsa'què' ladj nup tui' didza' cni Himeneo len Fileto. ¹⁸Gropè' ni gulachixi gulanignè' ca nac le nac gdutè li, le ta'né' chgdöd dza ral-la' lubán nup chnatgac, len gulabequè' bröli la'gac bunách ga rdxintè cutur ta'yejlè' Cristo. ¹⁹Le benè' tsutsu Dios zoatecz, len dè tu le rac bè', le rna: "Nunbè'è Dios nup náquigac queè'." Rna ca': "Gul-cuít ga dè le cunác, yúgu'tèli' lbi'ili' náquili' queè' Cristo."

²⁰Tu lu yu'u zxön yu'ugac le náquini, clègz oro len plata, san lèzca' le náquini yag len yu. La'gac tu'gún leygac dxin bunách ga lna', ati' yela'gac tu'gún leygac dxin bunách ga cunác lna'. ²¹Quiè gacru' ca nac lè na' tu'gún dxin bunách ga lna', len quiè gac gunru' le nac dxi'a len gacru' lsaca' ugunè' rè'u dxin Xanru', ral-la' gcuitru' ga rac le cunác. Chqui' gunru' cni, gacru' lsaca' gunru' yúgu'tè dxin dxi'a.

²²Gru'n le tun ga nu sè ladxì' le cunác ca rac quequè' bönni' ra'bandau'. Bè' ladxu'u gacu' tsahui'. Ben le run ga réjlè'u Cristo len le run ga nadxi'icnu' lza'u, len le run ga rbözu' dxi'adau'. Ca nacgac lè ni, ben tsaxón nup tu'lídZ Xanru', nac gdu dxi'a icj ládxi'dau'gac. ²³Na'a, gru'n yugu' didza' ca'z len didza'

cuzaca', le nözcnu' tun ga ta'díl-l didza' bunách. ²⁴Bönni' huen dxin queè' Xanru' cutu ral-la' tíl-lenè' bunách didza', san ral-la' gaquè' nöxj ladxì' laugac yúgu'tè bunách. Ral-la' gac usèdnè' bunách, len gaquè' ca' zxon ladxì'. ²⁵Lu yöl-la' nöxj ladxì' ral-la' uzéjni'nè' nup ta'dá'baga' le runè' lban qui. Chqui' gunè' cni, nazx ca' gu'è lequè' latj Dios lubí'i ládxi'què' quiè lumbè'è le nac gdutè li. ²⁶Cni lulé' lu yal-lj qui tu' xöhui' ga nadzunquè', ati' luhuöaquè' tsahui' quiè lunè' ca rè'nnè' Dios.

Ca lac bunách dza tsajséytégac

3 Lèzca' ral-la' gnöznu' lè ni: Dza tsajséytégac lac dza la'zaca' la'guí'i bunách. ²Yugu' dza ni' la'cu'è bönni' lacquè' cni: La'dxi'í' la' cúngaczè' len luhuídi'nè'. Lun ba zxon cuinquè' len luluí' cuinquè' blau. La'né' zi'è qui le nac la'y. La'dá'baguè'è xuz xna'què'. Lacquè' curdzág ladxì'. Cutu lunè' ca rè'nnè' Dios. ³Cutu la'dxi'inè' ca ral-la' lunè'. Lacquè' zidz ladxì'. La'né' qui lza'què'. Cutu la'ná be'i cuinquè'. Lacquè' bönni' dza'a. Cutu la'lé'inè' dxi'a le nac dxi'a. ⁴Lacquè' udód lzè'i len cutu la'dzaguè' dxi'a. Luluí' cuinquè' ca bönni' nayépsètèrquè'. La'dxi'inè' le la'dzágZ ládxi'què' len clèg Dios. ⁵Luluí' cuinquè' ca bönni' núnbè'què' Dios, san la'dá'baguè'è

le ruzá' ladxë'ë queëru' Dios. Bcuit ga nacua' bunách cni. ⁶Lëzca' cni, lu yöl-la' banís quequë' la'yazië' gap nac lu yu'u len la'zí' yé'inë' yugu' ngul cunözi quië la'zí' lu na'cnu le lu'sëdnë'. La'bága'nu dul-la' zian ngul na', len lui' ládxi'cnu yugu' le la'zéz ládxi'cnu le cuzaca'. ⁷La'yónitecznu ngul ni didza' lun lban qui bunách, san cutu ca' la'dél-li'nu la'yéjni'nu le nac gdutë li. ⁸Ca na' glaquë' Janes len Jambres, bönni' ni' guladá'baguë'ë Moisés, lëzca' cni lacquë' bönni' ni, la'dá'baguë'ë le nac gdutë li. Lacquë' chul nit len la'chíxinë' ca nac le réjlë'ru' Cristo. ⁹Cutu la'dél-li'rnë', san gac bë' nacquë' cunözi laugac yúgu'të bunách, gac quequë' ca na' guc quequë' Janes len Jambres na'.

Le rgu'ë Pablo lu na'bi' bi'i Timoteo

¹⁰Nözcnu' ca nac le rusëdda' bunách len ca runa'. Nöznu' ca' le rui' ladxa'a guna' len ca réjlë'a Cristo, len ca naca' nöxj ladxí, len ca nadxi'ida' lza'a, len ca rböza' zxön ladxí. ¹¹Nöznu' ca' yugu' le gulabía ládxi'gac neda' bunách, len yugu' le gzxaca' gdi'a, le glac quia' lu yödz Antioquía len lu yödz Iconio, len lu yödz Lистра. Yugu' le gulabía ládxi'gac neda' bunách ni' bia' blena', ati' Xanru' Jesús buslé' neda' lu yúgu'të lë na'. ¹²Yúgu'të nup të'ni lac gdu dxi'a le náquigac queë' Jesucristo, lëzca' la'zaca' la'gui'ë yugu' le la'bía ládxi'gac lequë' bunách.

¹³Na'a, lacrë' xöhui' bönni' tua'dö' len bönni' ta'zí' yë'ë. La'zí' yé'inë' bunách, ati' la'zí' ye'i ca' lequë' bunách.

¹⁴Na'a, ben chi'i yugu' le gzëdu' len le gzxi' lu na'u, le núnbë'czu' nup gulusëdi li'. ¹⁵Ga gdel-la' nacu' bi'idau' núnbë'u le nayujgac lu guich la'y, le huac luzéjni'tsqui li' quië uláu' le réjlë'u Jesucristo. ¹⁶Yúgu'të le nayúj lu guich la'y bchizië' Dios icj ládxi'dau'gac bunách queë', nup na' guluzúj lu guich didza' na' bë'ë Dios. Lë na' nayúj lu guich nactsca lsaca' usëdi rë'u, len ubíj ga lna' le runru', len ugú'u rë'u tu nöz, len usëdi rë'u quië gacru' tsahui'. ¹⁷Cni run, quië gac sina' nu nac queë' Dios, len gactsca gun yúgu'të le nac dxi'a.

4 ¹⁻²Ni'a queë' Xanru' Dios, lenca' ni'a queë' Xanru' Jesucristo, rna bé'ida' li' gunu' lban qui xtídzë'ë Xanru'. Lëczë' cuequi xbeynë' nup ni nabangac len nup chnatgac, dza ni' huödë' duná bë'ë. Bë' ladxu'u gunu' lë ni chqui' rac dxi'a quiu' o curác dxi'a. Lu yöl-la' zxön ladxí, bubíj ga lna' le tun bunách, len bsa' ládxi'quë' len bchiz icj nagquë' ca nac lë na' rusëdiru'. ³Cni ral-la' gunu' le gdxin dza cati' cutu luzé nagquë' zxba dxi'a, san lë'nnë' la'yönnë' le ta'dániznë'. Ca ta'zéz ládxi'quë' lutubë' quequë' nup lusëdi lequë'. ⁴Luca'në' le nac gdutë li, len la'zí' lu na'quë' yugu' didza' rdaz. ⁵Na'a, ral-la' gactu' zxön ladxí' ca nac yúgu'të le runu'. Bia' blen le lusaca' li' zi'. Ben lban qui didza' dxi'a. Gdu ladxu'u ben dxin le budödë' lu na'u Cristo gunu'.

⁶Ca nac quia' neda', nudöd cuina' lu në'ë Dios ati' chzoa ludöddë' neda' le runa' xchinë', ati' dza uzá'a yödzlyú ni chzoa gdxin. ⁷Ca

runè' bönni' gdu ladxè'è rijè' gdil-l, lèzca' cni bena' neda' dxin, len chbudx bena' le budödè' lu na'a Cristo guna', le bena' gdu ca rajlóz le réjlè'ru' Cristo. ⁸Yetú ca', nac löz quia' gdél-li'da' le ral-la' la'zì' nup nacgac tsahui', le gunnè' quia' Xanru' dza ni', ati' tsahui' nac ca rbequi xbeynè' rè'u. Clègz quia' neda' gunnè' lei, san lèzca' gunnè' lei quegac yúgu'tè nup ta'dxí'i Lè', len gdu ladxì'què' ta'bözè' dza huödè'.

**Le buzujè' lu guich Pablo
gunbi' Timoteo**

⁹Bè' ladxu'u guidteo' ga ni zoa' ¹⁰le bubíj ladxè'è neda' Demas, le nadxi'inè' le ruzi'è xbey yödzyú ni, ati' gyijè' yödz Tesalónica. Crescente gyijè' luyú Galacia, ati' bi'i Tito gyeajbi' luyú Dalmacia, le cni ben bayúdx lunè'. ¹¹Tuzè' Lucas zóalenè' neda'. Bchèl-bi' bi'i Marcos guídlenbi' li' tsaxxón, le nabi' gúnlenbi' neda' tsaxxón xchinè' Cristo. ¹²Bsöla'a-bi' bi'i Tíquico lu yödz Éfeso. ¹³Cati' guidu', bia' quia' lari' guitsa' na' buca'na' lu yödz Troas lu yu'u lidxè' Carpo, len bia' ca' quia' yugu' guich, len le nacr blau, bia' quia' guich náquicni guid. ¹⁴Alejandro, bönni' bèdx guía, zian le bi'è dō' quia'. Lèczè' Xanru' ubi'è queè' ca nacgac le benè' quia'

bönni' ni. ¹⁵Ben chi'i cuinu' queè' bönni' ni, le rdá'baga'tsquè' didza' runru' lban qui.

¹⁶Cati' zi'al lzu bdxina' lauquè' bönni' yúlahui', nutu nu guclen neda', san gulubíj ladxì'gac neda' yúgu'tè bunách. Cutu rè'nda' uzí' lè' lequè' Dios. ¹⁷Gzóalenè' neda' Xanru', len butipè' ladx'a'a quiè udx guna' lban qui xtidzè'è quiè la'yöni yúgu'tè bunách gza'a. Cni guc, buslé' neda' Xanru'. Guc quia' tsa bulá' lu rú'aba' bèdx guixi'. ¹⁸Lèczè' Xanru' uslé' neda' lu yúgu'tè le curác dxi'a, len gun chi'è neda' ga gdxinte' ga rna bè'è Lè' ni' yehua' yubá. Gactecz queè' yöl-la' ba yúgu'tè dza zi'a za'c. Ca' gac.

**Pablo rugapè' Dios
bunách queè' Cristo**

¹⁹Bgap Dios Priscila len Aquilo, lenca' bunách nacuá' lidxè' Onesíforo. ²⁰Buga'nè' Erasto lu yödz Corinto, ati' buca'na'-nè' Trófimo luyú Mileto le ré'inè'. ²¹Bè' ladxu'u guidu' ga zoa' zi'al cati' gdxin beo' ziaq. Tu'gapè' Dios li' Eubulo len Pudente len Lino, len Claudia, len yúgu'tè böchi' lza'ru' ni.

²²Rnaba' lahuè' Xanru' Jesucristo sóalenè' li'. Gaclen li' le ruzá' ladxè'è quiu' Dios. Ca' gac.